



PRIMEIRU-MINISTRU

DISKURSU

SUA EXELÉNSIA PRIMEIRU-MINISTRU

REPÚBLIKA DEMOKRÁTIKA TIMOR-LESTE

KAY RALA XANANA GUSMÃO

IHA SIMEIRA ASEAN – NASOINS UNIDAS (ONU) BA DA-13

Jakarta, Indonézia, Iorom 5 fulan-setembru tinan 2023

Obrigadu, Señores Koprezidentes
Vosa Majestade,
Exelentísimus lideres ASEAN,
Sua Exelénsia Sekretáriu-Jerál Nasoins Unidas, António Guterres,
Distintus Señores no Señoras,

Iha-ne'e hanesan priviléjiu ida hamutuk ho lider sira ASEAN nian hodi partisipa iha Simeira ASEAN no Nasoins Unidas nian ida ne'ebé importante.

Hanesan membrus Nasoins Unidas nian, ami partilla no halo-tuir valór no prinsípiu sira ne'ebé hanesan tuir saida maka define ona iha Karta Nasoins Unidas nian.

Timor-Leste sai hanesan Estadu Membru Nasoins Unidas nian ba da-191, bainhira restaura ami-nia independénsia iha tinan 2002.

Ami-nia ezisténsia hanesan Estadu independente tanba ami deve ba kapasidade rezisténsia no determinasaun ami-nia povu nomos Nasoins Unidas nian.

Bainhira ami hala'o ami-nia relasoins internasionais, Timor-Leste kaer valór fundamentál sira Nasoins Unidas nian – povu hotu-hotu iha direitu ba autodeterminasaun no independénsia, soberania permanente povu nian kona-ba sira-nia rikusoin no rekursus naturais, protesaun ba direitus umanus, respeitu mútuu ba soberania, integridade territoriál no igualdade entre Estadus no la iha interferénsia ba asuntus internus Estadus nian.

Ami louva lideransa hosi Sua Exelénsia, António Guterres, hanesan Sekretáriu-Jerál Nasoins Unidas.

Iha dinámika globál atuál, ami fiar katak la iha individualidade ida ne'ebé di'ak-liu atu lidera Nasoins Unidas no luta ba orden internasional ida ne'ebé di'ak-liu ne'ebé ofereše dignidade humana, justisa no igualdade ba ema hotu-hotu.

Prinsípius Nasoins Unidas nian mós konsagra ona iha Tratadu Amizade no Kooperasaun Sudeste Aziátku nian hanesan kódigu konduta ba kooperasaun ho nasaun sira ASEAN nian.

Tratadu ida ne'ebé Timor-Leste asina ona iha tinan 2007, bainhira kompromete atu halo tuir valór sira ASEAN nian.

Timor-Leste mós apoia implementasaun Perspetivas ASEAN nian kona-ba Indo-Pasífiku. Hosi perspetivas ne'e, entre sira seluk, destaka mós Objetivus Dezenvolvimentu Sustentavel Nasoins Unidas nian ba tinan 2030 hanesan ninia área kooperasaun prinsipál ida.

Ami espera bele asiste kolaborasaun ida ne'ebé boot tebes entre ASEAN no Nasoins Unidas iha implementasaun ba objetivu komún hirak-ne'e, ne'ebé sei fó kontributu importante ida ba rejiaun ne'e no ba komunidade mundiál.

Iha mundu ohin loron ida ne'ebé fragmentadu, ho dezafiu sira ne'ebé durante ne'e seidauk akontese, Timor-Leste kontinua fiar katak '*Right is Might*'.

Timor-Leste apoia direitu soberanu no mekanizmu internasional sira, hanesan Konvensoins Nasoins Unidas, ne'ebé kria konfiansa iha sistema mundiál no ajuda atu evita tensaun sira ne'ebé transforma ba violénsia.

Ha'u agradese ba líderes ASEAN no Sekretáriu-Jerál Nasoins Unidas nian ba oportunidade ida-ne'e.